

**Մ Ո Վ Ս Է Ս Խ Ո Ր Ե Ն Ա Յ Ո Ւ
Վ Կ Ա Յ Ո Ւ Թ Ի Ի Ն Ն Ե Ր Ը
Մ Ա Մ Ի Կ Ո Ն Ե Ա Ն - Խ Ա Ղ Բ Ա Կ Ե Ա Ն Տ Ո Հ Մ Ի
Ծ Ա Գ Մ Ա Ն Մ Ա Ս Ի Ն ***

Ռ Ա Ֆ Ա Յ Է Լ Մ Ա Թ Ե Ի Ո Ս Ե Ա Ն

Հին Հայաստանի պատմութեան կարեւոր հիմնահարցերից է հայ ազնուական տոհմերի ծագման խնդիրը, որը սերտորէն առնչուած է ժողովրդագրութեան հիմնահարցերի: Հին Հայաստանում ստրկատիրութեան շրջանում եւ վաղ միջնադարում գործել են բազմաթիւ նշանաւոր տներ: Նրանց ծագումնաբանութիւնը վաղուց է հետաքրքրել հայ պատմա-բանասիրութեանը: Դեռեւս ԺԸ-ԺԹ. դդ. սկզբին դրա վերաբերեալ արտայայտուել են տարբեր կարծիքներ, բայց դրանից շատերը հնացել են եւ վերանայման կարիք ունեն:

Նորովի մեկնաբանման եւ ճշգրտման կարիք ունի նաեւ, մեր կարծիքով, հին ազնուական-նախարարական տներից մէկի՝ Մամիկոնեանների ծագման հարցը, որը, թերեւս, ամէնից յաճախ է արծարծուել հայագիտութեան մէջ:

Խնդրոյ առարկան պարզելու համար գլխաւոր աղբիւր է հանդիսացել Մովսէս Խորենացու Հայոց պատմութիւնը, ուր նրան յատկացուած է յատուկ գլուխ: Դա Բ. գրքի ձա գլուխն է, որը վերնագրուած է՝ «Եթէ՛ ուստի եւ զիա՛րդ ազգ Մամիկոնէից»:

Այստեղ ասուած է.

Վախճանեալ Արտաշրի որդւոյ Սասանայ՝ թողու զթագաւորութիւնն Պարսից որդւոյ իւրում Շապհոյ: Ի սորա աւուրս ասեն եկեալ ի Հայս նախնի ազգին Մամիկոնէից յարեւելից հիւսիսականէն, ի քաջատոհմիկ եւ ի գլխաւոր աշխարհէ եւ ամենայն հիւսիսականաց ազգաց առաջին ասեմ իսկ զձենացն. որ ունին զրոյցս այսպիսիս:

Յամս կատարման կենացն Արտաշրի, Արբոկ ոմն ձենբակուր, որպէս ասի ի նոցա լեզուն պատիւ թագաւորութեան. սորա երկու դայեկորդիք, Բղղոխ եւ Մամգոն անուն կոչեցեալ, մեծ նախարարք: Եւ չարախօսեալ Բղղոխայն զՄամգոնայն՝ հրամայեաց թագաւորն ձենաց Արբոկ սպանանել զՄամգոնն: Զոր իմացեալ Մամգոնայն՝ ոչ գայ ի կոչն

արքայի, այլ փախուցեալ աղխիւ իւրով անկանի առ Արտաշիւր թագաւորն Պարսից: Եւ Արքով հրեշտակս առաքէ խնդրել զնա. եւ ի չլսելն Արտաշիւրի՝ պատերազմ ի վերայ նորա յօրինէ թագաւորն ձենաց: Եւ իսկոյն մեռեալ Արտաշիւրի՝ թագաւորէ Շապուհ:

Արդ՝ թէպէտ եւ ոչ տայ Շապուհ զՄամգոնն ի ձեռս տեառն իւրոյ, այլ եւ ոչ յԱրեաց երկրին թողու. բայց ամենայն աղխիւն իւրով առաքէ զնա իբրեւ զվտարանդի առ գործակալս իւր որ ի Հայս: Եւ յղէ առ թագաւորն ձենաց՝ ասելով, թէ Վի՛ թուեսցի քեզ դժուար, զի ի ձեռս քո ոչ կարացի տալ զՄամգոն. վասն զի երդուեալ էր նմա հօրն իմոյ ի յոյն արեգական. այլ վասն անխռով զքեզ առնելոյ՝ հալածեցի զնա յաշխարհէս իմմէ յեզր երկրի եւ ի մուտս արեւու, որ հաւասար է նմա մահու. եւ արդ մի՛ լիցի պատերազմ ընդ իս եւ ընդ քեզ: Եւ զի քան զամենայն բնակեալս ի վերայ երեսաց երկրի խաղաղասէր ասեն գոյ զազգն ձենաց՝ յանձն առնու առնել զհաշտութիւն. ուստի յայտ իսկ է, եթէ են արդարեւ խաղաղասէր եւ կենսասէր ազգն ձենաց:

Սքանչելի է եւ աշխարհն առատութեամբ ամենայն պտղոց, եւ գեղեցիկ բուսովք զարդարեալ, քրքմաւէտ եւ սիրամարգաշատ եւ բազմամետաքս, անբաւութիւն յամուրաց եւ հրեշից, եւ որ էշայծեմունսդ անուանեն. ուր հասարակաց կերակուր ասին զառ մեզ պատուական եւ սակաւուց ճաշակելիս՝ զփասեան եւ զպոր, եւ այլք այսպիսիք: Այլ զականց եւ զմարգարտաց ոչ ասեն գիտել զհամար մեծամեծացն. իսկ պատուականքս առ մեզ զգեստուց եւ սակաւուց ազանելիք՝ հասարակաց նոցա է զգեստ: Եւ այս յաղագս աշխարհին ձենաց:

Իսկ Մամգոնայ յոչ կամաց եկեալ յաշխարհս մեր՝ հանդիպեցաւ զալստեանն Տրդատայ. եւ ոչ դարձաւ ընդ զօրս Պարսից, այլ ամենայն աղխիւն իւրով ընդ առաջ զնաց մեծաւ պատարագաւ. եւ Տրդատ ընկալաւ զնա, բայց ընդ իւր ի պատերազմ ոչ հառ յերկիրն Պարսից. այլ ետ տեղի աղխի նորա եւ ռոճիկ ի կերակուր, փոփոխելով տեղի ի տեղտէջքովանդակ ամս:

Միանգամայն բնական է, որ պատմաբանասիրութիւնը խընդրոյ առարկան պարզաբանելու համար հիմք է ընդունել մէջբերւած վկայութիւնը, փորձելով ճշդել, ստուգել, բացատրել նրա առանձին հատուածները, տեղանունները եւլն.:

Առաջինը գիտնականներից հարցին անդրադարձել են Հ. Մի-
քայիլ վրդ. Չամչեանն ու Հ. Ղուկաս վրդ. Ինճիճեանը: Նրանք ա-
ռանց վերապահութեան ընդունում են Խորենացու հաղորդումը
Մամիկոնեան տոհմի ծագման մասին²:

Նիկողայոս Ադոնցը 1901ին հայ միջնադարեան պատմիչներ
Սերէոսի, Խորենացու եւ Փաւստոս Բուզանդի երկերի փոխադարձ
կապերի եւ ազդեցութեան հարցը քննելիս անդրադարձել է նաեւ
ինդրոյ առարկային եւ այն կարծիքն է յայտնել, որ Մամիկոնեան-
ները եկել են ձենաստանից, հաւանական համարելով ձենաստանը
նոյնացնել Չինաստանի հետ: Սակայն միջանի տարի անց, 1908ին
լոյս տեսած մի այլ աշխատութեան մէջ, նա ձենաստանը տեղադ-
րել է Մանիկա-Չանիքում, ճեներին նոյնացնելով ծաների հետ: Եր-
կու դէպքում էլ նա Մամիկոնեաններին համարում է եկուոր³:

Հ. Կարապետ վրդ. Տէր Սահակեանը, 1906ին լոյս տեսած մի
լօղուածում փորձում է հիմնաւորել իր տեսակէտը, թէ Մամիկոն-
եանների նախահայրը եղել է պարթեւ վաղարշ Ե. Թագաւորը
(209-216): Նա վկայակոչում է Հ. Ներսէս Անդրիկեանի աշխատու-
թիւնը, ուր հեղինակն առանց որեւէ ապացոյցի, վարդան, վասակ,
վաչէ անունները համարում է իրանական եւ դրա հիման վրայ
տոհմին վերագրում է իրանական ծագում: Մամիկոնեանների
պատմութիւնը, ըստ Տէր Սահակեանի, այնպէս սերտ է կապուած
Լուսաւորչի տոհմի պատմութեան, որ անհնարին է առանց ցեղա-
բանութեան պարզաբանման: Մամիկոնեանների ցեղը Արշակունի
էր, իսկ ազգանունը ստացել էր Մամգունից⁴:

Մամիկոնեաններին Չինաստանից եկած է համարում նաեւ Իշ-
խան Միքայիլ Թումանեանը, գրելով թէ՛ «ծագում են այնտեղ
ընակուող հնդիկ արիներից»⁵:

Հ. Սահակ վրդ. Կոզեանի կարծիքով կամսարականներն ու
Մամիկոնեանները միաժամանակ գաղթել են Հայաստան Բակտր-
իայից՝ Տրդատ Բ-ի կամ Խոսրով Ա-ի օրօք, պարթեւ Արտաւան
Թագաւորի մահից (224ից) յետոյ⁶: Նոյն կարծիքին են նաեւ Գէորգ
Ասլանն ու Ժողէֆ Լորանը:

Հաննէս Շկոլդը⁸ եւ Յակոբ Մանանդեանը նոյնպէս Մամիկոն-
եաններին համարում են գաղթած: Մանանդեանը վկայակոչում է
Սերէոսի եւ Խորենացու տեղեկութիւնները եւ միանում է Կոզեանի
կարծիքին⁹:

Գէորգ Աբգարեանը լատուկ ուսումնասիրութիւն է նուիրել
Սերէոսի Պատմութեանը: Նրա կարծիքով Բուզանդի Հայոց պատ-
մութեան առանձին տեղեկութիւններից երեւում է, որ Մամիկոն-
եանները Հայաստան են եկել Տրդատ Բ-ից շատ առաջ, հայ Արշա-

կունի առաջին թագաւորների օրօք: Սպարապետ Մանուէլ Մամիկոնեանը Վարազդատ թագաւորին (374-378) դիմում է հետեւեալ խօսքերով. «Ի հնոց ժամանակաց հետէ միամտութեամբ առ ձեզ՝ Արշակունիս վաստակեալ եմք... ամենայն նախնինքն մեր առաջինքն անկան 'ի պատերազմունս 'ի վերայ ձեր...»¹⁰: Նախադասութեան առաջին բառերը մատնանշում են Վարազդատից միջանի սերունդ առաջ եկած ժամանակներ:

Նոյն Մանուէլի խօսքերից երեւում է, որ առաջին Արշակունիները արդէն ճանաչում էին Մամիկոնեաններին. «առաջին թագաւորքն Արշակունիք, որք գիտէին զմեզ ով էաք կամ ուստի էաք»¹¹:

Արգարեանը մատնանշում է, որ հայ եւ օտար աղբիւրների քննութեամբ պարզուել է, որ Մամիկոնեանները հաստատուել են Հայաստանում Տրդատ Բ.ից եւ Խոսրով Ա.ից շատ առաջ¹²:

Խորենացուն յայտնի եղած աւանդութեան համաձայն Մամիկոնեանների նախահայրը եղել է մէկ մարդ՝ Մամգունը, այնինչ Ագաթանգեղոսի լուրարէն թարգմանութեան մէջ երկուսն են՝ Մամիկ եւ Կոնակ:

Մանուկ Աբեղեանը գտնում է, որ սա յատուկ է ժողովրդական վէպին՝ «զուգ անուններից իբրեւ մի անձի անուն ընդունուելը, ինչպէս Մամ-Կոն Խորենացու մօտ, յատուկ է ժողովրդական վէպին»¹³:

Ադոնցը կարծում է, որ Խորենացին ինքն է միացրել Մամ եւ Կոն անունները եւ դարձրել մէկ անուն՝ Մամգուն («որպէսզի աւելի օտարահնչիւն տեսք տայ նրան») ¹⁴: Արգարեանի կարծիքով, Մամիկոնեանների զրոյցի հնագոյն սկզբնաղբիւրում, այսինքն ժողովրդական աւանդութիւնում, որը գրի է առնուած Ագաթանգեղոսի անուամբ, գաղթի կապակցութեամբ որեւէ թագաւորի անուն հաւանաբար նշուած չի եղել: Գաղթը այս կամ այն թագաւորի հետ կապելը ուշ ժամանակի արդիւնք է ¹⁵:

Կիրիլ Թումանովը Մամիկոնեաններին վերագրում է ճենական ծագում, հիմք ընդունելով Բուզանդի տեղեկութիւնները ¹⁶:

Հրանդ Ք. Արմէնը Մամիկոնեաններին նոյնպէս համարում է օտար (սկիւթացի կամ թաթար), որոնք եկել են Հայաստան Գ. դարում: Նրա կարծիքը խիստ քննադատել է Հայրիկ Մուրադեանը ¹⁷:

Խաչատուր Վէմեանը ձեռնաստանը տեղադրում է Բակտրիայում (այժմ՝ Բալխ), հաւաստի համարելով Խորենացու տեղեկութիւնը Մամիկոնեանների գաղթի մասին ¹⁸:

Այսպիսով, հայ բանասիրութիւնը, լենուելով Խորենացու, ինչպէս նաեւ Ագաթանգեղոսի, Սերէոսի, Բուզանդի տուեալների վրայ, Մամիկոնեաններին համարում է եկուոր, ձենաստանից, անկախ նրանից, թէ որտեղ է տեղադրուած ձենաց աշխարհը:

Սակայն Խորենացու մօտ կան այլ տեղեկութիւններ Մամիկոնեանների ծագման վերաբերեալ, որոնք մեր կարծիքով, վկայուած են այդ տոհմի հայկական ծագումը եւ որոնք առիթ են տալիս նորովի մեկնաբանելու նրա Պատմութեան այն գլուխը, ուր պատմուած է ձենաբակուրի եւ ձենաստանի մասին:

Սակայն մինչ նշուած տուեալների վկայակոչումը եւ նրանց մեկնաբանումը անհրաժեշտ է անդրադառնալ յարակից կարեւոր մի հարցի, որը սերտօրէն առնչուած է Մամիկոնեանների ծագման խնդրին: Խօսքը վերաբերում է Խաղբակեանների նշանաւոր տոհմի եւ Մամիկոնեանների ծագումնաբանական ընդհանրութեան: Այդ մասին մանրամասն գրել ենք մեր նախորդ երկու յօդուածներում. այստեղ համառօտ ներկայացնենք մեր փաստարկումներն ու եզրակացութիւնները:

ԺԲ.-ԺԴ. դդ. հայ ազդեցիկ ֆէոդալական տներից է Պռոշեան-Խաղբակեան տունը, որը հսկայական դեր է կատարել Չաքարեան Հայաստանի քաղաքական-մշակութային կեանքում: Գրաւոր աղբիւրներում նրանց ներկայացուցիչները հիմնականում լիշատակուած են սկսած ԺԲ. դ. վերջից, բայց հատուկենտ լիշատակութիւններ կան արդէն ԺԱ. դ. (օր.՝ Դլէն Խաղբակեանը 1040ական թթ. բնակուած էր Սիւնիքի Հաբանդ գաւառում, իսկ ԺԱ. դ. կէսերին Արշարունիքի Սանդղկավանքի ծաղկողներից էր Խաղբակը):

ԺԳ. դ. պատմիչներ Կիրակոս Գանձակեցու եւ Մխիթար Այբրիվանեցու հաղորդումների համաձայն Խաղբակեանների ներայացուցիչները՝ Վասակը, որդիների հետ 1201ին Խաչէնից եկել են Վայոց Ձոր եւ իւանէ Չաքարեանի բանակում մասնակցել ռազմական գործողութիւններին՝ սելջուկների դէմ: Այդ մասին մանրամասն գրել է Գարեգին Ա. կթղ. Յովսէփեանը *Խաղբակեանք կամ Պռոշեանք հայոց պատմութեան մէջ աշխատութիւնում*¹⁵:

Այս վարկածը սկիզբ դրեց Խաղբակեանների պատմութեան ուսումնասիրութեանը: Այնուհետեւ լետագայ աշխատանքները ի յայտ բերեցին նրանց պատմութեան նոր մանրամասներ:

Այսպէս, ԺԲ.-ԺԴ. դդ. Չաքարեան Հայաստանի ոչ մեծ իշխանութիւններից էր Մամիկոնեանների իշխանութիւնը Գուգարքի Տաշիր գաւառում՝ Դսեղ կենտրոնով: Որոշ տուեալներով այդ իշխանութիւնը գոյութիւն ունէր արդէն Ժ. դ.: Մեզ զբաղեցնող հարցի պարզաբանման համար կարեւոր տուեալներ են հաղորդում

իշխանութեան հոգեւոր կենտրոնի՝ Դսեղի Բարձրաքաչ Սրբ. Գէորգ վանքի արձանագրութիւնները: Նրանցից մէկը գրուել է 1247ին: Այն վկայում է, որ Խաղբակեանների ամէնախոշոր ներկայացուցիչ Պռոշ իշխանը գրամական նուիրատուութիւն է կատարել վանքի ժամատան կառուցման համար²⁰: Ոչ պակաս արժէք է ներկայացնում 1191ին Սանահնի վանքում գրուած արձանագրութիւնը, ուր լիշատակում են Դսեղի իշխան Համազասպի որդի Սմբատն ու նրա չորս որդիները, որոնցից մէկն էր Հասանը: ԺԲ դ. վերջում այս Հասանը Տաշիրից տեղափոխուել է Խաղբակեաններին պատկանող Խաչէնի Մեծառանք գաւառը: Այդ են վկայում նոյն գաւառում գտնուող Կօշիկ անապատի արձանագրութիւնները: Կօշիկը տեղադրուած է Խաչէնագետի վտակ Քոյատակ գետի հովտում, ուր գտնուում են նաեւ Մեծիրանց եւ Հաւապտուկ վանքերը: Վերջինը Պռոշեանների տոհմական գերեզմանատունն էր:

Հասանը եւ իր ընտանիքի անդամները (կինը, որդիները, դուստրը) լիշատակում են Կօշիկի արձանագրութիւններում (1265), նոյն Կօշիկում գրուած Աւետարանի (Կարմիր Աւետարան) լիշատակարանում (1237): Նկատի ունենալով բերուած փաստերը, Հասանի որդիների անունները՝ Մարծպան, Մամիկոն, որոնք բնորոշ են Դսեղի Մամիկոնեաններին, հնագէտ-վիճագրագէտ Գ. Սարգսեանը եզրակացրել է (մեր կարծիքով՝ միանգամայն իրաւացի), որ Հասանը Համազասպեան-Մամիկոնեան տան ներկայացուցիչ է եւ ընտանիքով Տաշիրից տեղափոխուել է Խաչէն (Մեծառանք գաւառ)²¹:

Բայց Կօշիկ եւ Հաւապտուկ վանքերի արձանագրութիւններից երեւում է նաեւ, որ այստեղ էին գտնուում Խաղբակեան-Պռոշեանների կալուածները, այլ կերպ՝ Խաղբակեանների տիրութիւնները Խաչէնում համընկնում էին Հասան Մամիկոնեանի կալուածքի հետ Մեծիրանց գաւառում, որը պատահական լինել չէր կարող: Այս փաստերը հաստատում են երկու տների սերտ կապերը:

Մի կարեւոր վաւերագիր նոյնպէս մատնանշում է նշուած երկու տոհմերի մերձաւորութիւնը:

Վերը լիշուած Վասակ Խաղբակեանի եղբայր Ջաջուռի դուստրը Վանենին 1232ին պատուիրել է գրել ձեռագիր (Աւետարան) եւ նուիրել Հաւապտուկին: Յիշատակարանում Վանենին իրեն անւանում է «դուստր բարեպաշտ իշխանին Ջաջուռ, որդոյ Խաղբակայ, Թոռն Բակ իշխանին»²²:

Նա նկատի ունի Աւարայրի ճակատամարտի մասնակից Բակ իշխանին, որին լիշատակում է նաեւ Եղիշէն: Եղիշէն եւ նրանից օգտուող Վանենին հաղորդում են, որ ճակատամարտից յետոյ Բա-

կը եւ այլ հայ իշխաններ պատասպարուել են մի ինչ-որ ամբողջում: Պարսիկները պաշարել են ամբողջը, իսկ Բակը գիշերով փախել է: Եղիշէն չի գրում թէ ու՛ր, բայց նոյն Եղիշէի հաղորդումից յայտնի է, որ Աւարայրից յետոյ հայ իշխանները ընտանիքներով ապաստանել են Արցախում, Խաղտիքում եւ Տմորիքում:

Այս Բակ իշխանին Յովսէփեանը համարում է Խաղբակեան տոհմի նահապետ²³:

Բակի փախստավայրը յայտնի է Վանենու լիշատակարանից՝ Հաւապտուկ վանք, որը ըստ իր իսկ վկայութեան, Ջաջուռի եւ նրա նախնիների «բնական տունն էր եւ շիրիմը»: Վանենու եւ Եղիշէի վկայութիւններից երեւում է, որ Բակը (կամ Խաղբակը) Ե. դ. տեղափոխուել է Արցախ այլ շրջանից: Բայց ո՞ր տոհմից էր Բակը: Դա պարզուած է ուշ շրջանի աղբիւրից. 1322ին Կուքի վանքում գրուած ԺԲ. դ. հայ մատենագիր Ներսէս Լամբրոնացու Պատարագի մեկնութեան լիշատակարանում ասուած է, որ ձեռագիրը գրուել է «Յիշխանութիւն նահանգիս մերոյ թուին Պոռչազոր ի յազգ է Վարդանանց՝ Վասակա»: Հ. Ղեւոնդ Ալիշանն ու Յովսէփեանը իրենց մեկնութիւններում Վասակի տոհմը համարել էին «Վարդանանց»²⁴:

Այս հաղորդումից բխում է, որ Պոռչը եւ նրա տոհմակիցները «Վարդանանց ազգից», այն է՝ Մամիկոնեանների տոհմից էին: Պէտք է նշել, որ «Պոռչեան» ազգանունը արհեստական է. այն շրջանառութեան մէջ է դրել Յովսէփեանը Պոռչեանք կամ Խաղբակեանք աշխատութեան հրապարակումով: Պոռչեան տան ներկայացուցիչները ԺԳ.-ԺԴ. դդ. աղբիւրներում լիշատակում են որպէս «Խաղբակենց» կամ «Հաղբակենց»²⁵:

Պոռչեան-Խաղբակեանների սերտ կապերը Մամիկոնեանների հետ ակնյայտ են. Պոռչ իշխանի մասնակցութիւնը Մամիկոնեանների հոգեւոր կենտրոնի ժամատան կառուցմանը, նրա նուիրատուութիւնը Կօշիկ անապատին, ուր գտնուած էր Համազասպեան-Մամիկոնեանների գերեզմանատունը, երկու տոհմերի կալուածքների տեղադրութիւնը նոյն (Մեծիրանց) դաւառում, Մամիկոնեանների տոհմական անունների գործածութիւնը Պոռչեանների տոհմում՝ այս բոլորը պատահական չեն: Նրանք մատնանշում են երկու տոհմերի միջեւ ազգակցական կապերը, որոնք գալիս են դեռեւս Ե. դ.: Մեր կարծիքով Խաղբակեանները ծագում են Մամիկոնեան տոհմից, նրանց ճիւղերից մէկն են, եւ ԺԲ.-ԺԴ. դդ. կոչւել են «Խաղբակենք»²⁶:

Նրանց ազգակցութիւնը հաստատում են նաեւ երկու տոհմերի հերալդիկ նշանները:

Երկուսի զինանշանների յօրինուածքի հիմնական բաղադրամասը ընդհանուր է՝ ճանկող արծիւ: Խաղրակեանների նշանը քանդակուած է պատմական Վայոց Ձորի յուշարձաններում՝ Թանատի վանք (Գլաձորի համալսարան), Գոմեր, Մարատուս գիւղերի եկեղեցիներում, Կեչառիսում, Վանստանում (Իմիրզէկ): Նրա լաւագոյն եւ ամբողջական օրինակն է Գեղարդավանքի 1283ին կառուցուած ժայռափոր եկեղեցու քանդակը, ուր ճանկող արծուի հետ ներկայ են պահպանիչ առիւծներ: Ճանկող արծիւը եղել է նաեւ Մամիկոնեանների զինանշանը դեռեւս Դ. դ.²⁷: Այն պահպանուել է նաեւ ԺԲ.-ԺԴ. դդ., առկայ է Դսեղի Բարձրաքաչ վանքում եւ գիւղամիջի կիսաւեր եկեղեցու քանդակում: Ընդ որում, վերջինը յօրինուածքով նոյնանում է Գեղարդի հերալդիկ քանդակին, ունի պահպանիչ առիւծներ (պահպանուել է ձախակողմինը)²⁸: Այդ զուգադիպութիւնը նոյնպէս հաստատում է երկու տոհմերի ընդհանուր ծագումնաբանութիւնը:

Մամիկոնեանների եւ Խաղրակեանների ազգակցութիւնը (ընդհանուր ծագումը) մեր կարծիքով, կասկածից վեր է:

Այժմ դառնանք Խորենացու վկայութիւններին:

Պատմութեան Ա. գրքի ե. գլխում («Յաղագս հաւասար դալոյ ազգաբանութեան երից որդւոցն Նոյի ցԱբրահամ...» պատմահայրը տալիս է Հայկի եւ նրա յետնորդների տոհմածառը.


Թորգոմ ծնանի զՀայկ
Հայկ ծնանի զԱրամանեակ
Արամանեակ ծնանի զԱրամայիս
Արամայիս ծնանի զԱմասիայ:

Այնուհետեւ ժբ. գլխում, որը կոչոււմ է «Յաղագս որ ի Հայկայ ազգէ եւ ծնունդէ, եւ թէ զի՛նչ իւրաքանչիւր ոք ի նոցանէ գործեաց», ասուած է, որ Արամանեակը տարիներ ապրելուց յետոյ սերեց Արամայիսին, որը կառուցեց Արմաւիրը:

Արամայիսի որդին էր Շարան²⁹, իսկ վերջինիս որդին Գուշարը:

Խորենացու հաղորդմամբ Գուշարը եւ նրա զաւակները Հայաստանի մէջ Արշակունեաց հարստութեան հիմնադիր Տրդատ Ա.ի (Վաղարշակի) ժամանակ տիրում էին Գուգարքի հարաւային մասին: Պատմելով, թէ Վաղարշակ թագաւորը ինչպէս կազմակերպեց թագաւորութիւնը, հաստատելով նախարարների պաշտօններն ու նրանց տիրոջները, պատմիչը գրում է. «Իսկ Գուշարայ, որ յորդւոցն Շարայի, ժառանգեաց ցլեառն Մթին, որ է կանգարք, եւ

զկէս մասինն Ջաւախաց, զԿողբ, զԾով, զՁոր, մինչեւ ցամուրն
 Հնարակերտ: Բայց զտէրութիւնն Աշոցայ, եւ զսեպհականութիւնն
 Տաշրաց կարգէ Վաղաշարկ ի գաւակացն Գուշարայ Հայկազնոյ՝³⁰
 Այսպիսով, Գուշարի տոհմածառը հետեւեալ տեսքն ունի.



Համաձայն այս տոհմածառի, Գուշարը Հայկազն էր եւ ծագում
 էր Հայկի սերնդից: Ընդ որում, Խորենացին ունի ուղղակի վկա-
 յութիւն, որ Գուշարը Հայկազեան զարմից էր՝³¹

Մեր կարծիքով, Գուշարը նոյն Խաղ (Խաղբակ) անձնանունն է,
 քանի որ բաղաձայնները ըստ արտաբերման տեղի կազմում են
 հակադրական զոյգեր: Միեւնույն շարքում կարող են միաւորուել
 արտաբերութեամբ մօտ հնչիւններ: Հայերէնում ըստ արտաբեր-
 ման տեղի առանձնացում են շարքերը: Ըստ արտաբերման եղա-
 նակի հակադրական զոյգեր են՝

- չ-իս (չաղ-իսաղ, շաչ-իսաչ, շեղ-իսեղ)
- գ-ղ /իս/ (տեգ-տեղ)
- իս-հ (վաիս-վահ)

Հակադրական զոյգեր են կազմում նաեւ ձայնաւորները, դրան-
 ցից է ա-ու հակադրութիւնը (տար-տուր, սար-սուր) եւլն.³²

Հակադրութիւնների օրինաչափութեամբ Գուշ(ար) անունը
 ձեւափոխուում է «Խաղ» անուան, Գուշարից առաջանում է Խաղբա-
 կը: Եթէ ճիշդ է մեր առաջարկած ստուգաբանութիւնը, ապա
 Խաղբակեանները նոյն Գուշարեաններն են եւ սերում են Հայկից:
 Դա նշանակում է, որ Խաղբակեան-Մամիկոնեանները, սերելով
 Հայկից, հայկական ծագում ունեն, այլ ոչ թէ օտար (ճենական, ի-
 րանական):

Ազգանունան փոփոխումը Գուշարեանից Խաղբակեանի, ան-
 շուշտ, տեւել է երկար ժամանակ. այսօր մօտաւոր ճշդութեամբ
 կարելի է որոշել փոփոխման աւարտի ժամանակաշրջանը: Այդ

տեղի է ունեցել Դ.-Ե. դդ. սահմանագլխին, որովհետև «Փահսամակ»ի ընդարձակ օրինակում 92րդ համարով նշուած է «Խաղբանք» ազգանունը³³ :

Աւելի յստակօրէն ժամանակը կը ճշդուի երբ կը գտնուեն «Գուշ» եւ «Խաղբ» անունների միջանկեալ օրինակները, որոնք առայժմ մեզ յայտնի չեն, բայց մենք շարունակում ենք նրանց որոնումները:

Յատկանշական է, որ Գուշարի ժառանգական տիրոջները գտնուում էին Գուգարքի հարաւային մասում, որը այժմ անուանում են Տաշիր-Ձորագետ՝ (Վիրահայոց լեռներից մինչեւ Աղստեւի հովիտը):

Միանգամայն հնարաւոր է, որ նշուած երկրամասը հնագոյն ժամանակներից Մամիկոնեանների ժառանգական սեփականութիւնն էր, շատ աւելի վաղ, քան մեզ յայտնի Դսեղի իշխանութիւնը: Երկրամասի այսօրուայ տեղանուններից մի քանիսը կապուած են Մամիկոնեան-Խաղբակեան տոհմական անձնանունների հետ: Դրանցից են Հաղբատ, Դսեղ (աղաւաղուած Խաղբ), Ճոճկան-(ՁՈՂիկ), Ձաջուռ եւլն.: Չենք կասկածում, որ յատուկ ուսումնասիրութիւնը կը բազմապատկի նման օրինակները: Հնարաւոր է, որ Գուգարք տեղանունը առաջացած լինի Գուշար անունից:

«Խաղբակեան» տոհմանունը կապուած է նաեւ Մամիկոնեանների տիրոջ Տալքի որոշ տեղանունների հետ, օր. Խախ (այժմ՝ Խախու) գիւղանուան: Մեր կարծիքով ակնյայտ է հնագոյն ժամանակներում Ճորոխ գետի աւազանում, տառիների հարեւանութեամբ բնակուող Խալիբ ցեղի անուան նմանութիւնը «Խաղբ» տոհմանուան հետ. «ի» ձայնաւորի սեղմուելով մնում է «Խալբ» անունը որը նոյն «Խաղբ»ն է: Այդ դէպքում Խաղբակեանների տիրոջները միջնադարում պէտք է գտնուէին Տալք նահանգում, որը պատկանել է Մամիկոնեաններին:

Վերը շարադրուածից ելնելով մենք գտնում ենք, որ Մամիկոնեանները Հայաստանում ապրել եւ գործել են շատ աւելի վաղ քան Մամիկն ու կոնակը ժամանել են Հայաստան: Այդ մասին ուղղակի մատնանշում են Բուզանդի վերը վկայուած տեղեկութիւնները: Ընդ որում, նախորդ մասնագէտներից ոմանք (օր. Միքայէլ Թումանեանը) գտնում են, որ Ա. դ. մ.թ.ա. եւ Ա. դ. մ.թ. վասակ անունը կրող երկու սպարապետերը, (որոնց լիշատակում են Ա. դ. մ.թ. հռոմէացի պատմիչ Տակիտոսն ու Բ. դ. մ.թ. յոյն պատմիչ Արրիանոսը), պէտք է որ պատկանէին Մամիկոնեան տոհմին: Այդ են յուշում նրանց անունն ու պաշտօնը³⁴: Դա միանգամայն հնարաւոր է, չնայած առայժմ փաստերով չի հաստատուած:

Բայց ամենակարեւորը այն է, որ աւելի քան 90 տարի առաջ, գիտնականներից Ադոնցը 1908ին, մատնանշել է Մամիկոնեան տոհմի նահապետին՝ դա Տիգրան Մեծի զօրավար Մամկայուն է, որը մ.թ.ա. 69ին Լուկուլլուսի զօրքերի կողմից Տիգրանակերտի պաշարման ժամանակ ղեկավարում էր մայրաքաղաքի պաշտպանութիւնը³⁵։ Թուժանեանը այս հարցում համամիտ է Ադոնցի հետ, իսկ Գրիգոր Խալաթեանցն ու Մանանդեանը վկայակոչում են Ադոնցին առանց մեկնաբանութիւնների³⁶։ Սակայն անցած 90 տարիներին նշուած Մամկայունը չարժանացաւ պատմաբանների եւ բանասէրների ուշադրութեանը։ Միայն 1971ին լոյս տեսած Հայ ժողովրդի պատմութեան ակադեմիական հրատարակութեան առաջին հատորում նշուած է, որ Մամկայունը իրաւացիօրէն համարուած է Մամիկոնեան տոհմի նախնի³⁷։

Մեր կողմից աւելացնենք, որ Մամկայունը ոչ թէ նախնի, այլ տոհմի ներկայացուցիչ է, որովհետեւ Խաղբակեան-Մամիկոնեանները աւելի հին տոհմ են քան Մամկայունը։

Վերը շարադրուած փաստարկումներից յետոյ մենք գտնում ենք, որ Խորենացու Պատմութեան այն գլուխը, որը կոչուած է «Եթէ՛ ուստի եւ զի՛մրդ ազգ Մամիկոնէից» չի առընչուած Մամիկոնեան տոհմի ծագման եւ հարցի պարզաբանման համար հիմք ծառայել չի կարող։

Նշուած գլխի տեղեկութիւնը կարելի է մեկնաբանել երկու տեսանկիւնից.-

1. Կամ անհրաժեշտ էր հիմնաւորել Մամիկոնեանների արքայական ծագումը, մի հանգամանք, որ արտայայտուած է նաեւ Բուզանդի Պատմութիւնում. սպարապետ Մանուէլ Մամիկոնեանը դիմելով վարազդատ Թագաւորին ասում է. «Մեք չեմք իսկ լեալ ձեր ծառայք, այլ ընկերք ձեր եւ ՚ի վերոյ քան զձեզ, զի մեր նախնիքն լեալ էին Թագաւորք աշխարհին ձենաց»³⁸։

2. Հնարաւոր է, որ Մամիկոնեան-Խաղբակեան տոհմի որեւէ ներկայացուցիչ Հայաստանից անցել է ձենաստան, իսկ բաւական ժամանակ անց նրա ազգակիցներ Մամիկն ու Կոնակը եկել են Հայաստան, որը եւ ընկալուել է որպէս «ճենացի» «Մամիկի» ժամանում հայոց երկիր։

Բացի այդ, Խորենացու վկայութիւնից երեւում է, որ Մամիկոնեան տոհմը շատ աւելի հին է, քան նրանց հանրաճանաչ ազգանունը։ Վերջինը նրանք կրել են միայն սկսած Գ. դ. առաջին քառորդից։ Ազգանունն փոփոխումը տեղի է ունեցել ի պատիւ Տրդատ Գ. Արշակունի Թագաւորին ժամանակակից Մամիկոնեան տոհմի նահապետի, որին պատմիչը անուանում է «ձենազնեայն»

Մամգոն»։ Այս Մամգոնը սպանել էր դաւաճան Սղուկ Սլկունուն, որը պարսից շահ Շապուհ Բ. արքայի դրդմամբ ապստամբել էր Տրդատի դէմ եւ սպանել նրա քրոջ դայեակին։ Ի հատուցումն ծառայութեան, Տրդատ թագաւորը պարգեւատրել էր Մամգունին, յանձնելով նրան Սլկունիների կալուածները, բացի այդ՝ «կարգէ զնա նախարար ի տեղի ապստամբին, անուանելով յանուն իւր Մամգոնեան»³⁹։ Խորենացու «Մամգունը» նոյն սպարապետ Արտաւազը Մամիկոնեանն է, որին լիչատակում է Ագաթանգեղոսը⁴⁰։

Այս իրադարձութիւնը տեղի է ունեցել Գ. դ. առաջին քսանամեակում, քանի որ Շապուհ Բ.ը գահակալել է 309 ից, իսկ Տրդատ Գ. Արշակունին՝ մինչև 330։ Հենց այդ ժամանակահատուածում էլ Մամգունի տոհմը կոչուել է «Մամիկոնեան»։ Ինչ ազգանուն է կրել տոհմը մինչ այդ՝ պէտք է պարզի առաջիկայ ուսումնասիրութիւնը։ Մեր կարծիքով այդ ազգանունը եղել է Հաղբակեան (Նաղբակեան)։

Ներկայ ուսումնասիրութեամբ կատարուած է առաջին քայլը Մամիկոնեան տոհմի ծագումնաբանութեան նոր լուսաբանման ուղղութեամբ։ Համոզուած ենք, որ լետագայ աշխատանքները ի յայտ կը բերեն նոր տուեալներ յօգուտ այդ տոհմի բուն հայկական ծագման։

ԾԱՆՕԹԱԳՐՈՒԹԻՒՆՆԵՐ

* Սոյն աշխատութեան նախնական տարբերակը կարգացուել է Մովսէս Խորենացու Հայոց պատմութեան 1500 ամեակին նուիրուած միջազգային գիտաժողովում. տես՝ Ռաֆայէլ Մաթեոսեան «Մովսէս Խորենացին Մամիկոնեանների ծագման մասին», Մովսէս Խորենացու Հայոց Պատմութեան ստեղծման 1500 ամեակը. միջազգային գիտաժողովի դրոյթներ, խմբագրեցին Գ. Խ. Սարգսեան եւ Պ. Մ. Մուրադեան, Երևան, 1991, էջ 46-47։

¹ Մովսէս Խորենացի, Պատմութիւն Հայոց, աշխատութեամբ Մ. Աբեղեան եւ Ս. Յարութիւնեան, Տփղիս, 1913, էջ 221-223։

² Հ. Միքայէլ վրդ. Չամչեանց, Պատմութիւն Հայոց, հտ. Ա., Վենետիկ, 1784, էջ 373, 414. Հ. Ղուկաս վրդ. Ինճիճեան, Հնարարութիւն աշխարհագրական Հայաստանեայց աշխարհին, հտ. 2, Վենետիկ, 1835, էջ 141։

³ N. Adonts, "Nachalnaia istoriia Armeni' u Sebeosa v ee otnosheniakh s trudami Moiseia Khorenskogo u Fausta Vizantiiskogo" [Սերէոսի մօտ «Հայոց նախնական պատմութիւնը» Մովսէս Խորենացու եւ Փաւստոս Բուզանդի աշխատութիւնների հետ իր առնչութիւններով], տես՝ Vizantiiskii Vremennik, հ. VIII, թողարկում 1-2, Սանկտ Պետերբուրգ, 1901, էջ 89-92. նոյնի՝ Հայաստանը Յուստինիանոսի դարաշրջանում, Երևան, 1987, էջ 447-448. սոյն աշխատութիւնը նախապէս լոյս է

- տեսել ուռածին՝ Armenia v epokhu Iustiniana, Սանկտ Պետերբուրգ, 1908, էջ 403-404.
- ⁴ Հ. Կարապետ Տէր Սահակեան, «Վաղարշ Ե. պարթևաց թագաւորը նախահայր Մամիկոնեանց», *Բազմալէզ*, 1906, թիւ Թ. (Սեպտեմբեր), էջ 390-397. Հմմտ.՝ Հ. Ներսէս Աղբրիկեան, *Բիւզանդի Մամիկոնեանները*, Վենետիկ, 1904, էջ 10.
- ⁵ Միքայէլ Թումանեան, «Միջանի նկատողութիւն Մամիկոնեանց դադթականութեան մասին», *Հանդէս Ամսօրեայ*, 1911, թիւ Թ. (Սեպտեմբեր), սիւնակ 521-522.
- ⁶ Հ. Սահակ վրդ. Կոզեան, *Կամսարականները «Տեարք Շիրակայ եւ Արշարունեաց», Վրենա*, 1926, էջ 13-14.
- ⁷ Kévork Aslan, *Études historiques sur le peuple arménien*, Paris, 1928, էջ 133, 155-156; J. Laurent, *L'Arménie entre Byzance et l'Islam depuis la conquête arabe jusqu'en 886*, Lisbonne, 1980, էջ 101, 116, ծանօթ. 109.
- ⁸ Hannès Sköld, "L'Origine des Mamikonians d'après Moïse de Khorène", *Revue des études arméniennes*, tome V, fascicule 1, Paris 1925, էջ 131-136.
- ⁹ Յակոբ Մանանդեան, *Երկեր*, հտ. Բ., Երևան, 1978, էջ 93.
- ¹⁰ Գէորգ Արզարեան, «Մերձուր պատմութիւնը» եւ *Անանուի առեղծուածը*, Երևան, 1965, էջ 89-90. Հմմտ.՝ Փաւստոսի Բիւզանդացւոյ պատմութիւն հայոց, ընազիրը Բ. Պատկանեանի, թարգմանութիւնը եւ ծանօթագրութիւնները Ստ. Մալխասեանցի, Երևան, 1987, Ե. դպրութիւն, գլուխ 15., էջ 366.
- ¹¹ Նոյն
- ¹² Արզարեան, էջ 92.
- ¹³ Արզարեան, էջ 96. Մանուկ Աբեղեան, *Հայ Ժողովրդական վէպը*, Թիֆլիս, 1908, էջ 115.
- ¹⁴ Adonts, *Nachalnaia istoriia*, էջ 90.
- ¹⁵ Արզարեան, էջ 87, 94.
- ¹⁶ C. Toumanoff, "The Mamikonids and the Liparitids", *Armeniaca, Mélanges d'Études arméniennes*, Venise, 1969, էջ 125-128, 133.
- ¹⁷ Հրանդ Գ. Արմէն, «Մամիկոնեանները Արշակունեաց օրով», *Պատմական քննարկումներ*, Պէլլութ, 1968, էջ 129-136. Հալլիկ Մուրադեան, *Վարդանեանց արտադրութեան մասին*, Երևան, 1989, էջ 218-226.
- ¹⁸ Ռաչատուր Բ. Վէճեան, «Մամիկոնեանց նախահայրնիքը», *Բանբեր Հարաստանի արիւններ*, 1968, No. 3 (15), էջ 201-204.
- ¹⁹ Գարեգին Յովսէփեան, *Ռադրակեանք կամ Պոռշեանք հայոց պատմութեան մէջ*, Աթիլիս, 1969, էջ 14.
- ²⁰ Գ. Սարգսեան, «Բարձրացաչ վանքը՝ եւ նրա վրմագրութիւնը», *էջմիածին*, 1951, Լ. տարի, թիւ ԺԲ, Նոյեմբեր-Դեկտեմբեր, էջ 50.
- ²¹ Գ. Սարգսեան, «Նոր նիւթեր Մամիկոնեան-Համազասպեան իշխանական տան վերաբերեալ», *Հրաբեր հասարակական գիտութիւններ*, 1979, Մարտ, No. 3 (435), էջ 77-78.
- ²² Յովսէփեան, *Ռադրակեանք*, էջ 14.

- ²³ Եղիշէի վան վարդանայ եւ Հայոց պատերազմին, ի լրջ ածեալ բարդատութեամբ ձեռագրաց, աշխատութեամբ Ե. Տէր Մինասեան, Երեւան, 1957, էջ 122-123. Վճար. Երևան, էջ 14, 343:
- ²⁴ Հ. Ղեկոյ Ալիշան, Միասկան տեղագրութիւն Միւսեաց աշխարհի, Վենետիկ, 1893, էջ 18. Երևան, էջ 14:
- ²⁵ Երևան, էջ 304-305, 308-309 (բազմէ Հաղբակաց):
- ²⁶ Ռաֆայէլ Մաթեոսեան, «Պոռչեան ֆէոդալական տոհմի ծագումնաբանութիւնը», Հրատարակչական գիտութիւններ, 1986, Նոյեմբեր, No. 11 (527), էջ 65-70:
- ²⁷ Բուզանդ, էջ 106:
- ²⁸ Ռաֆայէլ Մաթեոսեան, «Պոռչեանների տոհմական զինանշանը եւ նրա պատմագրական վերլուծութիւնը», Պատմա-բանասիրական հանդէս, 1989, No. 2 (125), էջ 116-122:
- ²⁹ Նորենացի, Ա. գլ. Ե., էջ 19, Ա. գլ. Ժբ., էջ 39:
- ³⁰ Նոյն, Բ., գլ. Ը., էջ 113:
- ³¹ Նոյն, Բ., գլ. Կթ., էջ 217:
- ³² Ա. Պաշտարեան, Ժամանակակից հայերէնի ճշխնաբանութիւնը, Երեւան, 1988, էջ 53, 86-88:
- ³³ Մոսկովի Հայկական, Կ. Զ., էջ 37:
- ³⁴ Թումանեան, սիւնակ 521:
- ³⁵ Աղոնց, Հայաստանը..., էջ 457, 461. Appiani, De bello Mithridatico, էջ 84, 86:
- ³⁶ G. Khalatians, Ocherk istorii Armenii [Հայաստանի պատմութեան ուրուագիծ], Մոսկուա, 1910, էջ 183. Թումանեան, սիւնակ 521. Մանանդեան, Երկեր, հտ. Ա., Երեւան, 1977, էջ 499, ծան. 2:
- ³⁷ Հայ ժողովրդի պատմութիւն, հտ. I, Երեւան, 1971, էջ 673, 681:
- ³⁸ Բուզանդ, Ե., գլ. ԼԵ., էջ 366:
- ³⁹ Նորենացի, Բ., գլ. Ժդ., էջ 229:
- ⁴⁰ Ազաթանգեղոս, Հայոց պատմութիւն, Թիֆլիս, 1914, գլ. 860, էջ 434:

MOVSES KHORENATSI'S ACCOUNT ON THE ORIGIN OF THE
MAMIKONIAN-KHAGHBAKIAN DYNASTY

(Summary)

RAFAYEL MATEVOSIAN

The article focuses on the origin of one of the most renowned Armenian noble families, the Mamikonians.

After outlining the traditional view on the origin of the Mamikonians, that they fled from China and took refuge in Armenia in the late third or early fourth century A.D., the author discusses the different views of various scholars in this regard. He observes that the fiefdoms of the later medieval Armenian noble family, the Khaghbakians, overlapped those of the Mamikonians. This fact, together with other details (such as the coat of arms of the two dynasties, their names, etc.), leads the author to suggest that these two families had strong ties with one another, going to the sixth century A.D. He claims that the Khaghbakians descended from the Mamikonians and quotes several sources which, he argues, indirectly support this assumption.

The author disagrees with the renowned historian Nicholas Adonts, who suggested that Mamkayos, one of the generals of Tigran II the Great and the head of the Armenian defense forces in Tigranocenta in 69 B.C., could be the *nahapet* (i.e. the founder) of the Mamikonian-Khaghbakian dynasty. He argues that Mamkayos could only be a representative of the Mamikonian-Khaghbakian noble house since, he claims, this dynasty goes further back than the age of Mamkayos.